



Sud Bosne i Hercegovine
Суд Босне и Херцеговине

Broj: S1 3 Iž 037315 20 Iž
Sarajevo, 12.10.2020. godine

Sud Bosne i Hercegovine, u vijeću Apelacionog odijeljenja sastavljenom od sudija Zvezdane Antonović, kao predsjednika vijeća, Mirsade Džindo i Dinke Bešlagić-Čovrk, kao članova vijeća, odlučujući o žalbi Adrijane Đukić, Honenstieglan 13, 8152 Glattbrugg, Švicarska, izjavljenoj protiv Odluke Centralne izborne komisije Bosne i Hercegovine broj: 05-1-07-1-998/20 od 01.10.2020. godine o odbijanju upisa u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine, u nejavnoj sjednici, održanoj dana 12.10.2020. godine, donio je

R J E Š E N J E

Žalba se odbija.

O b r a z l o Ź e n j e

Odlukom Centralne izborne komisije Bosne i Hercegovine, broj i datum navedeni u uvodu, odbijen je upis u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine po podnesenim prijavama do 01.09.2020. godine, jer nisu ispunjeni uslovi propisani odredbom člana 3.15 stav 1., 2. i 3. Izbornog zakona Bosne i Hercegovine.

Žaliteljica je protiv navedene odluke blagovremeno izjavila žalbu navodeći da je dostavila prijavu, ali da je provjerom utvrdila da je nema ni na spisku prijavljenih za glasanje van BiH, ni na evidenciji odbijenih.

Centralna izborna komisija Bosne i Hercegovine dostavila je ovom sudu odgovor na žalbu u kojem je predložila da se izjavljena žalba odbije kao neosnovana iz razloga što žaliteljica nije upisana u Centralni birački spisak, niti je dostavila valjan

dokaz o prebivalištu (lična karta BiH ili potvrda o prebivalištu u BiH) da bi mogla biti upisana.

Ispitujući pobijanu odluku u okviru žalbenih navoda, vijeće Apelacionog odjeljenja Suda Bosne i Hercegovine je zaključilo da žalba nije osnovana.

Iz predmeta spisa utvrđeno je da je žaliteljica elektronskim putem podnijela prijavu za glasanje izvan BiH u kojoj je navela da se glasački materijal na njeno ime dostavi na adresu u Švicarskoj, Honenstieglén 13, 8152 Glattbrugg, te je u prilogu dostavila fotokopiju uvjerenja o državljanstvu BiH, kao i fotokopiju lične karte Švicarske.

Odredbom člana 1.4 Izbornog zakona BiH propisano je državljanin BiH sa navršenih 18 godina života ima pravo da glasa i da bude biran, ali da bi ostvario svoje biračno pravo mora biti upisan u Centralni birački spisak, u skladu sa Izbornim zakonom BiH.

Iako je žaliteljica državljanka Bosne i Hercegovine, pošto nije dokazala da ima prijavljeno prebivalište na teritoriji BiH, a što se dokazuje ličnom kartom BiH ili potvrdom o prebivalištu u BiH koje tužiteljica nije dostavila, imenovana osnovano nije upisana u Centralni birački spisak od strane nadležnog organa, kako to propisuje odredba člana 3.13 u vezi sa članom 3.5 Izbornog zakona BiH, pa time nije ni ispunila osnovni uslov za ostvarivanje prava za glasanje van BiH.

Pored navedenog, žaliteljica je postupila i suprotno odredbi člana 3.15 stav 1. Izbornog zakona BiH, kojim je, između ostalog, propisano da uz popunjenu i potpisanu prijavu podnosilac prilaže i dokaz o identitetu. Ovo iz razloga što je žaliteljica, umjesto da dostavi neki od važećih dokumenata u BiH, dostavila samo fotokopiju lične karte Švicarske, što se nikako ne može smatrati validnim dokazom o identitetu, u smislu odredbe člana 5.12 stav (4) Izbornog zakona BiH.

S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita, a žalba neosnovana, pa je istu, primjenom odredbe člana 81. stav 1. Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.

PREDSJEDNIK VIJEĆA
S U D I J A

Zvezdana Antonović